



Sesida dals

Communitgà ils

Protocol nr.

15 d'october 2024

18 d'october 2024

816/2024

Dumonda Tomaschett

concernent tempo 50 sin il sviament da Laax

Resposta da la Regenza

Il traject da la via sursilvana tranter ils access Laax Marcau e Laax Seehof na correspundeva ni a las prescripziuns actualas da la norma ni a las pretensiuns a la segirezza dal traffic. Per eliminar ils deficits en la geometria da la via è vegnì elavurà in project da schlargiament. Coordinà cun il project da via è vegnì elavurà in project da sanaziun cunter canera per la Via sursilvana e per la Via da Falera (vias chantunalas) sco er per differentas vias communalas en la vischnanca da Laax.

Tar la dumonda 1: En il chantun Grischun è l'Uffizi da construcziun bassa responsabel per la sanaziun cunter canera da las vias chantunalas. El coordinescha questa incumbensa cun las vischnancas. En cas da vias existentas ston las grevezzas da canera vegnir eruidas en in cataster (cataster da la grevezza da canera Vias; CGC), sch'i dat in motiv da supponer, che las limitas d'immissiuns (LI) tenor l'Ordinaziun davart la protecziun cunter canera (OPC; CS 814.41) sajan surpassadas. Il CGC vegn actualisà periodicamain e dat ina survista dals trassés da via che ston anc vegnir sanads. Sche las LI vegnan surpassadas, pia quellas limitas, a partir da las qualas la canera disturba considerablmain il bainstar da la populaziun, è il proprietari dal stabiliment obligà – tenor la Lescha federala davart la protecziun da l'ambient (Lescha davart la protecziun da l'ambient, LPAmb; CS 814.01) – da sanar la via cunter canera. Quai vala er per projects da vias. Per quest intent sto vegnir elavurà in project da sanaziun cunter canera, en il qual i vegn mussà, cun tge mesiras ch'ins po observar las LI da la OPC. Tenor l'art. 20 da la Lescha davart las vias dal chantun Grischun (LVias; DG 807.100) vegnan projects da sanaziun cunter canera exponids publicamain per prender invista. La Regenza decida davart las protestas cunter il project e davart l'approvaziun dal project da sanaziun cunter canera (art. 24 al. 1 LVias).

Tar la dumonda 2: Tenor l'art. 108 al. 2 lit. d da l'Ordinaziun davart la signalisaziun da las vias (OSV; CS 741.21) è la reducziun da la sveltezza maximala admissa cunzunt, sch'ina contaminaziun sproporziunada da l'ambient en il senn da la legislaziun davart la protecziun da l'ambient (canera, substanzas nuschaivlas) po vegnir reduci-

da. Cun il project da sanaziun cunter canera vegni sclerì, sche las mesiras previsas en il senn da l'Ordinaziun davart la signalisaziun da las vias èn necessarias, commensuradas e proporziunalas u sche autras mesiras ston vegnir preferidas (art. 108 al. 4 OSV). Da princip vali che la mesira la pli moderada sto vegnir realisada l'emprim. La reducziun da la sveltezza è ina mesira efficazia e proporziunala per reducir evidentamain la canera da la via. Uschia sa lascha cumbatter la canera da la via gia a la funtauna. Las reducziuns da la sveltezza èn la mesira la pli moderada, perquai ch'ellas custan pauc e perquai ch'igl è facil da las realisar. Ellas n'han betg mo in effect positiv sin la qualitat d'abitar e da viver, mabain augmentan er cumprovadamain la segirezza dal traffic. Sco gia menziunà decida la Regenza davart l'approvaziun dal project da sanaziun cunter canera.

Tar la dumonda 3: Fin la fin da l'onn 2023 è la sveltezza vegnida reducida sin ca. 13 km per motivs da la protecziun cunter canera, perquai che la reducziun da la sveltezza è ina mesira efficazia per reducir evidentamain la canera da la via. Per che ulteriuras abitantas ed abitants che vivan sper trajects da via pertutgads, vegnian distgargiadas da la gronda grevezza da canera, focussescha il chantun er en l'avegnir – en il rom da sia obligaziun da sanar – sin la reducziun da la sveltezza sco mesira da protecziun cunter canera e fa quint da realisar per ils proxims onns ulteriurs ca. 20 km sin la rait da las vias chantunalas che cumpiglia 1360 km.

Tar la dumonda 4: Indicaziuns pauschalas davart las plivalurs pervia da sanaziuns cunter canera n'èn betg pussaivlas. Pervia d'immissiuns da canera sproporziunadas pon immobiglias avair ina valur da martgà pli bassa. Cun ina sanaziun cunter canera che vegn fatga per obligaziun legala dal proprietari dal stabiliment, èsi pussaivel, ch'ina part da questa eventuala valur da martgà pli bassa vegnia puspè cumpensada. En il rom d'ina proxima valitaziun da revisiun vegn l'Uffizi per la valitaziun d'immobiglias ad evaluar las midadas da maun a Laax ed eventualmain ad adattar las valurs a las cundiziuns da martgà. Uschia vegnan er actualisads ils facturs relevants per las taglias (valur commerciala, valur fiscala). Taxas concretas da plivalur sco ch'ellas vegnan incassadas sin basa dal dretg davart la planisaziun dal territori per midadas da zona e per azonaziuns da bains immobigliars, n'èn betg previsas en la lescha en connex cun sanaziuns cunter la canera da vias.



En num da la Regenza

Il president:

Dr. Jon Domenic Parolini

Il chancelier:

Daniel Spadin